

CENTRO JUVENIL TANKI LEENDERT

ORANJESTAD (AAN) E contratista Arends Construction recientemente a haci entrega di e proyecto di Centro Juvenil Tanki Leendert na directiva pa medio di Ministro Obras Publica Sr.Charro Kelly y representante di Cede-Aruba Sra.Diet Booi.

Ta trata di un edificio cu a costa alrededor di Afl.320.000,= y cu a wordu financia cu ayudo di diferente instancia Hulandes y Arubano.

Sr.Toni Dijkhoff a gradici tur e instancianan cu a coopera cu e directiva y e contratista cu a haci un bon trabao.

Sr.Tony Dijkhoff a muestra tambe cu ta hopi trabao a wordu desplega pa voluntarionan tanto den directiva como pafor di directiva pa por a yega asina leeuw.

Pero alavez ta muestra cu ta awor cu e edificio ta cla e trabao mes ta cuminsa pa laga e centro funciona na bienestar di e bario.

Ministro Charro Kelly a muestra ariba e importancia di un centro asina pa desarrollo di un bario.

Un parti primordial sigur ta deporte, na unda bo ta crea un curpa sano y cu na su turno lo crea tambe un comunidad sano.

E promer presidente di Centro Juvenil Sr.Chinto Erasmus, di e directiva rebiba na 1987, a laga sa cu e ta orgulloso di ta pertenecer na e pueblo di Tanki Leendert y vicendario cu poco poco tambe ta participa na e desarrollo y progreso di Aruba.

Ela muestra tambe ariba e trabao dirigi ariba e juventud ya cu e juventud ta e flor di un nacion.

Juventud ta forma parti esencial di cambionan den nos comunidad y pesey mester tin atencion special pa e grupo aki.

Sr. Van Klaveren, representante di VNOA aki, na Aruba a bisa di ta satisfecho pa mira un edificio bunita y a menciona e trabao special cu Cede-Aruba ta haciendo.

E ta spera cu e edificio lo sirbi su meta pa e comunidad di Tanki Leendert y vecindario.

Por ultimo Sr. Karel Arends di e compania Arends Construction a expresa su gratitud cu tanto Cede-Aruba como Centro Juvenil a pone confianza den nan compania joven cu tambe ta crea espacio pa personanan joven haya oportunidad pa guia proyectonan.

Pa e proyecto na Tanki Leendert e tabata tin elogio pa e joven Edmond Sawney cu a sa di guia e proyecto aki.

Elogio tambe e tabata tin pa Sr.Orman di D.O.W.kende a haci su trabaonan di control



ariba construccion pa parti di Centro Juvenil.

A sigui un brindis despues, presente na e ocasion aki

tabata, Prome-Ministro Sr.Nelson Oduber, Ministranan,

Sr.Charro Kelly, Mr. Hendrik Croes, Sra.Ella Tromp-Yarazaray, Presidente di Parlamento Sr.Felix Flanegin, diferente parlamentarionan, representantenan di diferente instancianan, manera Diet Booi di Cede-Aruba, Sr.Van Klaveren di VNOA, miembronan di directiva, prensa y demas invitadonan.

Centro Juvenil Tanki Leendert na e momentonan aki ta preparando pa e apertura oficial cu lo mester bira algo inolvidable.

Directiva ta trahando pa haña inventario pa e Centro y tambe un tribuna pa e cancha deportivo.

Directiva kier a pone e Pueblo na altura cu diasabra dia 31 agosto 1991 pa 8.00 lo tin un bingo pa recauda fondo pa e organizacion.

E Bingo lo tuma lugar na e Centro Nobo mes na Tanki Leendert.